

Marlon Sneek lider nobo di fraccion AVP

ORANJESTAD – Fraccion di AVP tin un lider nobo. Rene ‘Baba’ Herdé a pasa su funcion pa su colega Marlon Sneek. Chris Dammers lo asumi e posicion di lider interno.

Esaki e partido ta informa.

“Ayer mainta e fraccion di AVP den Parlamento a tuma diferente decision riba organisacion di e fraccion cu pa algun tempo tabata pendiente. E decision mas importante ta e cambio di lider di fraccion.

Rene “Baba” Herde’ cu tabata e lider di fraccion for di año 2009, a pasa e funcion pa su colega Marlon Sneek cu for di 2013 tabata e lider di fraccion interino. Chris Dammer ta asumi awor e funcion di lider di fraccion interino.”

E fraccion tambe a tuma ‘otro decisionnan tin di haber cu reparticion di tareanan interno den e fraccion, forman nobo pa reunion den e fraccion y preparacion pa e año di bedate publico prome cu eleccion 2017’.

Segun lider di fraccion, sr. Herdé e escogencia pa sr. Sneek y sr. Dammers tabata uno a base di lo siguiente:

“Marlon Sneek a demostra un creatividad, inteligencia y habilidad politico grandi den e shete año cu a pasa. El a crece enorme y tanto na Aruba como den relacionnan den exterior, a demostra un capacidad y madurez pa maneha asuntonan y situacionnan den un forma cu a gana respet den y pafo di partido y Parlamento.

E hoben politico aki sin duda ta promete hopi pa futuro. Su nombracion como lider di fraccion ta simplemente un paso logico mas den su carera.”



“Chris Dammers a fungi e ultimo 5 año como Vice Presidente di Parlamento. Den fraccion e ta un di e organisadonan interno di hopi trabou cu e fraccion ta haci. Su profesion di ingeniero ta resalta den su trabou como un parlamentario bon organisa, disciplina y masha puntual. Su nombracion como lider interino di fraccion tambe tin e sosten completo di e fraccion y di partido.”

Presentacion

E fraccion ta notifica cu diahuebs mainta e lider y lider interino di fraccion di AVP lo wordo presenta na prensa local y internacional. Rene Herdé lo keda ocupa e funcion di Vice Presidente di Parlamento y di presidente di e Comision di Asuntonan Exterior & di Reino di Parlamento di Aruba. □